

**Sandro Pellegrini, Nicoloso da Recco e il suo viaggio verso le Isole Canarie – L'inizio di un'epopea genovese durata più secoli, Recco 2014, pagg. 112**

Do 2013 l'é scheito i seteçento anni da-a nascita de Giovanni Boccaccio, che inte 'n seu scrîto in latìn, *De Canaria et insulis reliquis ultra Hispaniam noviter repertis*, o l'ha parlòu de Nicoloso da Recco e do seu viâgio inte quelle îzoe. In sce l'argomento l'aotò o l'âiva za scrîto 'n articolo pe-o nòstro Boletin (n° 2/2014) e inte questo libro, arichîo da interesanti fotografie a coî, o ripòrta o tèsto de Boccaccio in latìn - co-a traduccion - e o frûto di stùddi ch'o l'ha ancón fæto dòppo avéi publicòu, do 1995, o vòlume *Nicoloso da Recco e la riscoperta delle Canarie. Un mercante di spezie alle isole Fortunate*. A dedica a l'é pe insegnanti e studenti do licèo scientifico de Recco, intitolòu da-a çitæ a-o seu gloriòso figgio ch'o l'ha avèrto a stradda a Colombo.




**Paolo Emilio Taviani, Elvio Varni, Pietro Cazzulo, Rita Barbieri (a cura di), Fascia – Un paese, una Chiesa, una Comunità, Edizioni d'arte Marconi, 1997, pagg. 128**

Questo libro, còmmè se védde, o no l'é de òua, ma o scindico de Fascia Elvio Varni o l'ha regalòu quest'anno a-a nostra bibliotèca. Lê o l'avéiva scrîto o primmo capitolo, in sciâ stòia do pàize, e o tèrso, insce l'emigración de tanti fasciòtti; o senatò Taviani o l'âiva fæto o segòndo, in sciâ Resisténsa, a-a quæ o l'âiva parteçipòu; don Cazzulo, ch'o l'é pàreco de mèza Âta Valtrebbia, e Rita Barbieri àivan scrîto a stòia da Gèxa, intèiza còmmè edifiçi e ativitàe.

Lezèndo se rivìve a vitta de questa comunitæ, pinn-a de fadîga e de stènti ma anche de solidarietà, co-in amò fortiscimo pe-o sò teritòio.

Gh'é tante belle fotografie, do pasòu e recènti, e a letûa a l'incoràggia a fâ 'na gîta da quelle parti, che se ghe màngia anche bèn, còmmè 'na vòtta.



**Pio Carli (con la collaborazione di Vincenzo Jacono), Dizionario dialettale Sanremasco-Italiano Italiano-Sanremasco, 2003**

A Famija Sanremasca a l'âiva voscîo a ristànpa anastàtica de questo vocabolâio perché no s'atrovâva ciù da acatâlo e – scrivéiva o prescîdènte de l'asociaçion Franco Formaggini - *L'idioma, in qualsiasi forma, è la spina dorsale tra le caratteristiche culturali di ogni comunità.*

A primma ediziòn do vocabolâio sanremasco-italiàn a l'êa stæta do 1971 e l'aotò, inta prefaziòn, o dîva d'avéi sentio o bezéugno de sarvâ o ciù poscibile da parlâ de Sanrémmo, primma che se ne perdésse pe sèmpre a memòia. Into 1980 o l'âiva pòi publicòu o vocabolâio italiàn-sanremasco ascì, completàndo a sò fadîga.

A-o Carli, pe questo travàggio e pe-a colabòraçion a-o Vocabolâio de parlate liguri, do 1980 A Compagna a gh'âiva dæto o prémio De Martini.

